

Sedmero mrtvih u nasilju u Egiptu

4 februar 2012 Izmijenjeno 00:09 CET

Četvero mrtvih u Suezu i troje u Kairu tokom sukoba policije s demonstrantima, koje je potaknuo nogometni meč prije dva dana



Prema ministarstvu zdravlja, najmanje 668 ljudi je ranjeno u sukobima u Kairu [EPA]

U petak su u Kairu izbili sukobi između demonstranata koji su tražili odlazak vojne vlasti i sigurnosnih snaga, u novom valu nasilja koji je zahvatio zemlju nakon krvoprolića na nogometnom igralištu. Najmanje četiri osobe su ubijene u egipatskom gradu Suez, tokom sukoba policije s demonstrantima. Dvoje demonstranata ubijeno je u Kairu samo nekoliko metara od Ministarstva unutarnjih poslova, a policija je ispalila suzavce i gumene metke a jedan vojnik je ubijen kada je policija naletjela vozilom na njega. Egipatska državna televizija je objavila da je u petak navečer zapaljena vladina zgrada u blizini ministarstva unutarnjih poslova u centru Kaira gdje su u demonstracijama učestvovali hiljade ljudi. Uzrok požara koji je zahvatio prvi kat poreske uprave još nije utvrđen, ali je poznato da su nepoznate osobe ušle u ovu zgradu, izjavio je jedan izvor sigurnosti za agenciju AFP.

Zahtijevaju odmazdu

Svjedoci u Suezu su kazali da su nemiri izbili pred lokalnom policijskom stanicom u ranim jutarnjim satima u petak, nekoliko sati nakon što su dva demonstranta ubijena. "Dobili smo dva trupla demonstranata ubijena pravim mecima", potvrdio je Reutersu liječnik u mrtvačnici u tom gradu. Ranije, stotine ljudi je ozlijeđeno u glavnom gradu, Kairu, tokom sukoba policije se demonstrantima koji optužuju vladajuće Vojno vijeće da ne vodi dobro zemlju. Na hiljade demonstranata je izašlo na ulice i zahtijevaju odmazdu za smrt 72 ljudi koji su ubijeni dan ranije tokom nasilja koje je uslijedilo poslije nogometnog meča u gradu Port Said, za koje je policija okrivljena da je nedjelotvorna.

Prema ministarstvu zdravlja, najmanje 668 ljudi je ranjeno u sukobima u Kairu.

Al Jazeera reporterka Sue Turton, koja izvještava iz Kaira, rekla je da su demonstranti napali zgradu Ministarstva u blizini trga Tahrir, pokušavajući da uklone barijeru od bodljikave žice. "Sve ovo se odvija u neposrednoj blizini trga Tahrir, ali je u ostatku Kaira situacija normalna", rekla je ona.

Zvanično 1482 ozlijeđenih

Ministarstvo unutarnjih poslova izvijestilo je o 1482 ozlijeđene osobe u sukobima koji traju već drugi dan, a jedna prodemokratska organizacija rekla je da jedan njezin član izgubio oko u okršajima. Demonstranti s maskama na licu su prerezali bodljikavu žicu i ušli u ulicu koja vodi prema Ministarstvu unutarnjih poslova,

izazivajući požare, dok im je iznad glava letjelo kamenje. Istodobno se više stotina ljudi okupilo u središtu Kaira na molitvi na trgu Tahriru, simbolu revolucionarnih snaga, blizu zgrade Ministarstva unutarnjih poslova, noseći egipatske zastave i uzvikujući poruke protiv vojnog režima koji vlada zemljom otkako je prije gotovo godinu dana pao režim Hosnija Mubaraka.

Izvor: Al Jazeera